

**Poli à lɛtɛɛŋi shɔnwuŋi ŋgemu
kan Kɔɛnti kànhɛ dánafeebil'á
ke
Mpe yii à yaa yii cè mà jwo yii jyè
lɛtɛɛŋi funŋɔ jwumpe e ke**

Poli u à ŋge lɛtɛɛŋi séme sahaŋki mà kan Kɔɛnti kànhɛ dánafeebii kuruŋk'á. U lɛtɛɛŋi niŋcyiini i, u mpyi a jwo na uru la nyɛ si sà yyaha yige pi na. Uru lɛtɛɛŋi tuugoŋkwooni kàntugo u nyɛ a jà a wyèr'a kàre me, naha kurugo ye u wwoŋɛŋi Timɔti mpyi a yîri Kɔɛnti kànhɛ e ná jwumpe p'e mà yyaha tíi ná dánafeebii kuruŋke e, mpemu p'à waha Poli na ke.

Dánafeebii mpyi a nyɛ kafinivinibii pìi jwumɔ na, pire mpyi a piye pyi Yesu tũntunmii. Pire kafinivinibii u kàlaŋi mpyi a kàntugo wà Jwumpe Nintanmpe na, Poli mpyi a fyâha a puru mpemu jwo dánafeebil'á ke. Pire kafinivinibii mpyi maha yi yu dánafeebil'á na Poli nyɛ Yesu tũntunŋɔ me. Lire mpyi a Poli lùuni pyi l'à yîri, ka u u lɛtɛɛ séme ná jwuŋgam'i mà tũgo Kɔɛnti dánafeebil'á. Uru lɛtɛɛŋi kyaa nyɛ a cè me, naha kurugo ye u à pînni. Titi u mpyi a sà uru lɛtɛɛŋi kan Kɔɛnti shiinbil'á.

Nyɛ lire kàntugo ka Poli ná Titi si núr'a piye nya, ka Titi si yi jwo u á na u lɛtɛɛŋi jwumpe na wá a ŋkèɛŋɛ lèŋɛ Kɔɛnti dánafeebii toroŋkanni i (7.1-7). Lire ná li wuuni mú i, Poli mpyi a li cè na dánafeebii pìi saha na nyɛ wani, mpiimu pi nyɛ na uru mɛpɛŋɛ yu ke. Lire kurugo u à ŋge lɛtɛɛŋi séme.

Nde l'à u zhèŋi fyìnnɛ pi yyére ná nde l'à u ta u à jwuŋgampe jwo pi na ke, u à lire yyaha jwo pi á. Mà bâra lire na, u à li cyêe pi na na uru funntanga wu u nyɛ, ɲaha kurugo yɛ jwumpe ur'à jwo a tùgo pi á ke, pur'à ŋkènnɛ pyi u à jyè pi karigil'e (1--7).

Wyérenɛ pi mpyi na bínini Zheruzalemu fòŋɔfeebii ntègenɛ mɛɛ na ke, u à màban le pi e lire wyére binnini na (8--9).

Lɛɛrenɛ takwɔɔre e, u à jwumpe waha mà yyaha tíi ná kafinivinibil'e, pire mpiimu pi mpyi a piye pyi Yesu tùntunmii ke, u à li cyêe pi na na uru Poli à sù Yesu tùntunŋɔ. Poli à yire jwo, ɲaha kurugo yɛ u la mpyi pire kafinivinibii si dánafeebii le kumpiini i mɛ (10--13).

Lɛɛrenɛ tasiige

¹ Mii Poli u nyɛ Yesu Kirisita tùntunŋɔ mà tàanna ná Kile nyii wuuni i ke, mii ná wuu cìmpworonɛ Timɔti u à nge lɛɛrenɛ séme, yii Kile dánafeebii kurunke ku nyɛ Kɔrenti i ná yii mpii puni pi nyɛ Kile wuu Akayi kùluni i ke, si ntun yii á. ² Wuu Tuɲi Kile ná wuu Kafoonɛ Yesu Kirisita pi ɲwɔ yii na, pi i yyenɛnke kan yii á.

Poli à fwù kan Kile á u ntègenɛ kurugo

³ Wuu Kile kêe, uru u nyɛ wuu Kafoonɛ Yesu Kirisita Tuɲi. Uru u nyɛ ɲùɲaare punifoo, uru u maha wuu tère tèrigii puni i, ⁴ maa màban leni wuu e yyefuge shiɲi puni tèrigil'e. Lire e wuu maha jìni na màban leni yyefuge shiɲi puni feebil'e, bà u maha u leni wuu e mɛ. ⁵ Yii li cè na, bà wuu maha yyefuge taa sèl'e Kirisita mɛge kurugo mɛ, amuni Kile mú maha màban leni wuu e sèl'e Kirisita cye

kurugo. ⁶ Mu aha wuu nya yyefuge e, lire nùŋke ku nyε si màban le yii e, yii raa si yyaha na Kile kuni i. Kile ká màban le wuu e, lire nùŋke ku nyε si màban le yii e, si yii pyi yii já a wuu kyaage shiŋi kwú yiye e. ⁷ Wuu à sàa dá li na na yafyin si n-jà yii pyi yii fwo-ro Kile kuni i mε, naha na yε wuu à li cè na, bà yii nyε na yii nàzhan lwúu ná wuu e kyaage e mε, amuni yii mú nyε na yii nàzhan lwúu màbanŋi ntaŋi i ná wuu e.

⁸ Nyε cìmpyiibii, yyefuge e wuu à tòro Azi kùluni i ke, wuu la na nyε yii i kuru cè. Ku fànhe mpyi a pèe mà tòro wuu pèrege na, fo wuu sàha mpyi a tèn ná l'e na wuu si n-shwɔ kwùŋi na mε. ⁹ Wuu mpyi a sàa li yaha na pi sí wuu bò, lire e wuu sàha mpyi a wuu sònŋore taha wuye na mε, fo Kile na, uru u maha kwùubii jèni ke. ¹⁰ Uru u à wuu shwɔ uru kwùŋi na, u sí n-pa wuu shwɔ sahanŋi. Sèe wi, wuu à tèn ná l'e na u saha sí n-pa wuu shwɔ. ¹¹ Yii mú na wuu tère ná Kileŋarege e. Yire Kileŋareyi niŋyahayi kurugo, kacenni Kile à pyi wuu á ke, shinŋyahara na fwù kaan u á lire kurugo.

Poli à u tashage kèenŋe

¹² Nde l'à wuu nùnyi yîrige ke, lire li nyε wuu toronŋanni diŋyεŋi i, mà cye cyán tēni i wuu mpyi yii shwɔhɔl'e ke. Wuu à li cè wuye e na wuu à lire pyi ná funvyinge ná sèenŋi i, Kile barag'e. Sùpyire yákilifente bà t'à lire pyi mε, ŋka Kile ntègenŋi cye kurugo l'à pyi. ¹³⁻¹⁴ Yii li cè na nde yii à kàla wuu l'etribil'e maa li yyaha cè ke, wuu nyε a yafyin séme mà tòro lire na mε. Wuu Kafoonŋi Yesu cannuruge wuu pi sí n-pyi kaŋuŋɔ si yii nùnyi yîrige, yii sí n-pyi kaŋuŋɔ si wuu wuyi yîrige. Yii à ŋcyère cè lire kani

i mà kwò, ñka mii na sônñi yii sí n-pa li puni yyaha cè sèl'e.

¹⁵ Mii à dá lire na, lire e, mii la mpyi si sà fwooro yii na, si ñwò yii na sahañki. ¹⁶ Mii la mpyi si ntòro yii yyére, si ñkàre Masedoni kùluni i, si yîri wani, si nùru mpa yii yyére, bà yii si mpyi si mii tège mii i jà a kàre Zhude kùluni i me. ¹⁷ Nyé mii nyé a pa shà me, lir'à li cyêe na li nyé a mpyi mii sèe na mà? Taha mii na na karigii pyi mà tàanna ná ðinyeñi sùpyire pyiñkanni i, maha jwo: «òon» maa nùr'a kèenñ'a jwo: «ònhò» la? ¹⁸ Kile u nyé ñwómee niñkin fooñi ke, uru u nyé mii shèrefooñi, mpe mii à jwo yii á ke, puru nyé a mpyi: «òon» ná «ònhò» tanuge e me. ¹⁹ Naha na ye Kile Jyañi Yesu Kirisita kyaa mii ná Siliven ná Timòti à jwo yii á ke, uru mú mpyi na «òon» ná «ònhò» yu kani ninuuni i me, ñwómee niñkinfoo u nyé u wi. ²⁰ Uru cye kurugo, Kile ñwomyahigii puni maha fûñhò, uru cye kurugo mú, wuu maha jwo: «Amiina» maa Kile mege pèe. ²¹ Kile yabiliñi u maha wuu ná yii fânhe nyahage Kirisita wwoñeegge e, uru mú u à wuu cwòonrò mà pyi uye wuu, ²² maa u fyèñi bwòn wuu na, maa u Munaani le wuu e. Lire kurugo yacenyi sañyi Kile à bégel'a yaha wuu mee na ke, wuu à tèn ná l'e na wuu sí yire ta.

²³ Yii li cè, mii la nyé a mpyi si ngaha nò yii na me, lire kurugo mii nyé a nùr'a shà wani yii yyére Kòrenti kànhe e me. Mii aha finé, Kile kà na yaha me, uru u nyé mii shèrefooñi. ²⁴ Wuu nyé na ñko si fânha cyán yii na yii ñaarañkanni i Kile kuni i me, ñaha na ye yii à fânha ta l'e. Ñka wuu la na nyé si yii tège bà yii funyi si mpyi si ntáan me.

2

¹ Lire e mii la saha ñye a mpyi si ntòro yii yyére, wuu kwò a sà wuye yyahayi tanha me, ² ñaha na ye mii aha yii yyahayi pyi y'à tanha, joofo u sí n-jà mii funñke pyi ku táan ye? Yii kanni pi sí n-jà mii funñke pyi ku táan, ñka mii aha yii yyahayi pyi y'à tanha, di yii sí n-jà lire pyi n-jwo ye? ³ Lire kurugo mii mpyi a letere tun yii á, bà li si mpyi, mii aha nò yii yyére, yii pi à yaa yii mii funñke táan ke, mii àha ñkwò sà yyetanhara ta wani me. Mii à dá li na na mii funntange na ñye yii puni funntanga. ⁴ Mii nàvunñò wu ná mii yyetanha wu u mpyi a letere séma tun yii á, mii mpyi na ñyilwòhe tírige. Lire ñye a pyi si yyetanhara nò yii na me, ñka si li cyée yii na na yii kyal'à waha mii na sèl'e.

⁵ Ngemu u à pyi yyetanhare ñùñke ke, mii Poli kanni yyahe bà urufol'à tanha me! Yii puni yyahayi urufol'à tanha. Ñka mii la ñye sì jwo ntòro me, lire e mii sí n-jwo, yii pì yyahaya u à tanha. ⁶ Yii shinñyahara à bê maa ndemu pyi urufoo na ke, lir'à yaa. ⁷ Ñka nume, yii yàfa u na, yii i màban le u e, bà li si mpyi u yyahe kà ñkwò ntanha si u yákiñji ñyàhañgurugo me. ⁸ Lire kurugo mii na li caa yii á, yii i li cyée u na na u kyal'à táan yii á. ⁹ Letereñi mii mpyi a séme mà tùugo yii á ke, mii mpyi a uru séme mú si yii zò shwò ñgí si ñcè kampyi yii na mii jwumpe puni kurigii ñaare. ¹⁰ Yii aha yàfa ñgemu na ke, mii mú sí yàfa urufoo na. Kirisita u ñye mii shèrefoñji, yii aha mii ñya lire na, mii à li pyi yii kurugo, ¹¹ bà li si mpyi, Sitaanniñi kà ñkwò tajyige ta wuu shwòhòl'e me, ñaha na ye wuu à sàa u funzòññòre cè.

¹² Nyε mii à nŏ Torasi kànhe e ke, Jwumpe Nintanmpe pu nyε na Kirisita kyaa yu ke, Kafoonji mpyi a kuni pwó mii á puru njwuñi kurugo. ¹³ Lire ná li wuuni mú i, mii yákiliñi mpyi a tēen mε, naha na yε mii nyε a mpyi a na cɪmpworonji Titi nya mε. Nyε ka mii i kuni cya pi á, maa ñkàre Masedoni kùluni i.

Poli báarañi pyiñkanni

¹⁴ Wuu fwù kan Kile á, uru u maha wuu pyi yawiye njemu yi maha Kile sífente cyêre wuu ná Kirisita wwoñεεge kurugo ke. U maha wuu pyi wuu u Kirisita kyaa yu cyeyi puni i. Lir'à Kirisita kani pyi l'à nŏ cyeyi puni i, bà wusunañi nùge maha ñkèεge kafεεge e mε. ¹⁵ Yii li cè na mpii pi nyε zhwoñi kuni i ná mpii pi nyε kwùñi wuuni i ke, Kirisita cye kurugo, wuu na nyε mu à jwo wusuna nùguntanga wu Kile á, ñgemu nùgo ku maha nŏni pire puni na ke. ¹⁶ Mpii pi nyε kwùñi kuni i ke, pir'á nùgumpεngε ki, ñkemu ku sí kwùñi nŏ pi na ke; mpii sí pi nyε zhwoñi kuni i ke, pir'á nùguntanga ki, ñkemu ku maha shìñi niñkwombaanji kaan ke*.

Nyε jofoo u sí n-jà ñge báarañi shiñi na yε?
¹⁷ Shinnyahara à Kile jwumpe pyi nàfuu cya kuro, ñka wuu nyε pire fiige mε. Kile u à wuu tun, u à li cè na wuu na u jwumpe yu fyinmpe funñke e, Kirisita wwoñεεge e.

* **2:16** Kàshige ká ñkwòn a kwò, mpii pi a pyi javeebii ke, pire maha ntàanna piye na, bilibii pi à ta kàshige cyage e ke, maa pire tàanna pi kàntugo maha mpa jyè kànhe e. Kànhe shiinbii funntanga wuubii maha cige wyεere niñcɛnnte tà kwòn maha ñcyán ñcyán pyenkuunji i, maa nùguntanga yaayi yà súgo. Kuru nùguntange ku maha fwore ke, kuru maha ntáan kàshikwònbil'á. Ñka ku maha mpyi bilibil'á kwù nùgo.

3

¹ Nye tá puru jwump'à li cyêe na wuu na wuye metanga yu yii á bε? Bà pi sanmpii maha li pyi mε, wuu à yaa wuu a lεterii kaan yii á, mpiimu pi nyε na wuu metanga yu laa, yii a pire figii tùuge wuu á? ² Yii yabilimpii pi nyε wuu lεterεni, ηgemu u à séme wuu zòmpyaagii na ke, sùpyire puni sí n-jà u kâla si u yyaha cè. ³ Sèenji na, yii na nyε lεterε, Kirisita à ηgemu séme wuu cye kurugo ke. U nyε a séme ná sémeηkyaani i mε, ηka ná Kile nyii wuηi Munaani i u à séme. U nyε a séme kafaatenyε na mε, ηka sùpyanji zòmbilini na u à séme*.

⁴ Kirisita cye kurugo, wuu à sàa dá lire na Kile yyahe taan. ⁵ Wuu nyε a li yaha wuye funη'i na báaraηi wuu nyε na mpyi ke, na wuu fànhe k'à u pyi mε, Kile fànhe cye kurugo wuu maha já a u pyi. ⁶ Uru u à pyiηkanna kan wuu á wuu pyi u báarapyii, wuu raa tunmbyaare nivǝnnte kyaa yu sùpyir'á. Tire tunmbyaare nyε mu à jwo saliya ηgemu u à séme mε, Kile Munaani i t'à fworο. Saliyanji maha mpa ηùηǝ kuu kwùηi na, ηka Kile Munaani maha ma ná shìηi niηkwombaanji i.

⁷ Saliyanji u maha mpa ηùηǝ kuu kwùηi na ke, Kile mpyi a uru karigii séme kafaatenyε ηuη'i. Uru Saliyanji mpyi a pa ná sìnampe mpemu i ke, puru mpyi maha Kile tùnntunηiMusa yyahe pyi ku u ηî, fo Izirayeli shiinbii mpyi na já a ku wîi mε, mà li ta puru sìnampe mpyi na si mǝ mε. ⁸ Nye Saliyanji kuni sìnampe ká mpêe lire pyiηkanni na, tá Kile

* **3:3** Saliyanji u mpyi a kan Musa á ke, uru mpyi a séme kafaatenyε na (Ekizodi 24.12). Kile tùnntunηi Zheremi a jwo na Kile sí u Saliyanji nivǝnηi séme sùpyire zòmpyaagil'e (Zheremi 31.33).

Munaani kuni wumpe cye sì n-tòro mε? ⁹ Kuni li maha kwùñi nò sùpyañi na ke, lire sìnampe ká mpêe amε, ndemu li maha sùpyañi pyi u à tíi Kile yyahe taan ke, lire u sìnampe cye sì n-tòro mà? ¹⁰ Sìnampe p'à fyânya a tòro ke, puru ñye a sli yafyin numε wumpe tεgεε baa wumpe taan mε. ¹¹ Yaage ku ñye yakwɔɔ ke, kuru ká sìnama ta, ñke ku ñye ku sì n-kwò mε, kuru wuuni ñye a tòro mà?

¹² Tire sònñore tatahage ku ñye wuu á, lire l'à wuu ta wuu u karigii pyi fyagara baa. ¹³ Wuu ñye na li pyi Musa fiige mε. Uru mpyi maha vâanña tò u yyahe na, Izirayeli shiinbii kà ñkwò u yyahe sìnampe ñya takwɔge e mε. ¹⁴ Pi yákilibii mpyi a pa ntò. Lire l'à pi ta ali ñijjaa, pi aha a tunmbyaare ñijjyεere jwumpe kâlali, li maha mpyi mu à jwo vâanña k'à para pi yyaha na, maha pi pyi pi sì raa pu yyaha çini mε. Kirisita wwoñεεge kanni cye kurugo kuru vâanñke sí n-jà n-láha wà yyaha na. ¹⁵ Ali ñijjaa, pi aha a Musa sémebii kâlili, kuru vâanñke maha pi yákilibii tò. ¹⁶ Ñka ñgemu ká núru maa uye kan Kafoonji á ke, kuru vâanñke maha láha urufoo yyaha na. ¹⁷ Kafoonji kyaa l'à jwo naha ke, Kile Munaani kyaa li. Kafoonji Munaani† ká mpyi ñgemu i ke, urufoo sàha maha mpyi bilere e mε. ¹⁸ Vâanña ñye a para wuu mpiimu yyaha na mε, wuu puni pi maha Kafoonji sìnampe ñaa‡. Lire kurugo canña maha canña, wuu maha ñkêenñi na mpyi Kafoonji fiige, sìnampe pà sí i bârali pà na. Kafoonji Munaani cye kurugo lire maha mpyi.

† **3:17** Kafoonji Munaani ná Kile Munaani ñye ñiñkin. ‡ **3:18** Pii maha jwo: «Wuu pi maha Kafoonji sìnampe wíi, maa pu cyêre mu à jwo dùba e pu ñye.»

4

¹ Kile à nùnaara ta wuu na, maa ñge báarañi le wuu cye e. Lire e sàage ñye na jyè wuu e mε. ² Wuu à numpire karigii puni ñwɔ yaha, ñúzogore na ntaa cyire ñcyiimu i ke. Wuu ñye na nàñwɔhɔrɔ pyi mε, wuu mú ñye na Kile Jwumpe labali na yu mε, sèenji wuu ñye na fíniñi na yu, bà sùpyire puni si mpyi si jà li cè piye e na wuu na ñye sèeshiin mε. Kile u ñye wuu shèrɛfooni cyire karigil'e. ³ Lire ná li wuuni mú i, Jwumpe Nintanmpe wuu ñye na yu ke, puru ká nta pu ñye a fíniñe mε, mpii pi ñye kwùñi kuni i ke, pír'á pu ñye amuni. ⁴ Tire sùpyire tí ñye tí ñye Kile kuni i mε, Sitaanniñi u ñye ñge dñyeñi ñùñufooni ke, ur'à tí yákilibii tò. Lire e Kirisita u ñye Kile nàñjañi ke, Jwumpe Nintanmpe pu ñye na uru sìnampe cyère ke, puru maha fíniñe pi á mε. ⁵ Wuu ñye na wuye kyaa yu yii á mà dε! Yesu Kirisita kyaa wuu ñye na yu, uru u ñye Kafooni. Wuu pi ke, wuu na báare yii á Yesu kurugo. ⁶ Kilenji u à jwo tèecyiini i na: «Bèenmpe pu láha numpini na» ke, uru ninuñi u à bèenmpe le wuu zòmpyaagil'e, bà li si mpyi, Kile sìnampe pu ñye Yesu Kirisita yyahe e ke, wuu u puru cè mε.

Poli fànhe méε ñye k'à cyère ke, u màbanñ'à ñyaha

⁷ Ñye uru ñcèñi sèe wuñi ñye wuu e, ali mà li ta wuu fàn'h'à cyère. Li ñye mu à jwo nàfuubwɔhɔ k'à le pworocwol'e bà li si mpyi si ñcè na sífente kakyanhala woore ñye a fworu wuu e mε, ñka Kile e t'à fworu. ⁸ Kyaage shiñi pun'à tège wuu na, ñka wuu maha tafworonɔ ta. Wuu yákilibil' à wùrugo, ñka sònñorɔ tatahaga ñye a fô wuu na mε. ⁹ Pi maha wuu kyérege, ñka Kile à kwôro ná wuu e. Pi maha

wuu bwùun na jcyáan, nka wuu maha yîri. ¹⁰ Pi maha wuu caa raa bùu tèrigii puni i bà pi à Yesu bò mε, nka Kile maha wuu wwû bà sùpyire puni si mpyi si jcé na Yesu na jye jyii na mε, na uru cye kurugo wuu jye jyii na. ¹¹ Mà wuu yaha jyii na, wuu na jye kwùñi laage e tèrigii puni i Yesu kurugo bà sùpyire puni si mpyi si jcé na Yesu na jye jyii na, maa fànhe kaan wuu cyeere fànha baa woor'á mε. ¹² Lire e wuu na jye kwùñi jwøge e bà yii si mpyi si shìñi sèe wuñi ta mε.

¹³ Y'à jwo Kile Jwumpe Semεñi i na: «Mii à dá Kile na, lire kurugo mii à jwo u mεge na.» Wuu mú à dá u na, lire kurugo, wuu na u jwumpe yu. ¹⁴ Wuu à li cè na Kile u à Kafoonji Yesu jè a yige kwùñi i ke, uru mú u sí wuu jè ná Yesu í, si wuu ná yii bínni u yyahe taan. ¹⁵ Nye yii kurugo jcyii karigii pun'à nɔ wuu na, bà shinnyahara si mpyi s'a bârali Kile kasinani ceveebii na, lire si fwùñi niñkanñi pyi u nyaha, u mεge si mpêe mε.

¹⁶ Lire l'à sàage pyi ku jye a jyè wuu e mε. Wuu cyeere fànhe méε ká a jcyérenji, là na bârali wuu múnahigii fànhe na canña maha canña. ¹⁷ Yyefuge nimbileni i wuu jye numε ke, kuru na wuu bégeli Kile sìnampe tεgεε baa wumpe mεε na, puru sì n-kwò mε. ¹⁸ Sùpyañi maha yaayi njemu jaa ke, wuu jye na yire caa mε. Nje yi jye wà jye na yi jaa mε, yire wuu jye na jcaa, jaha na ye yaayi sùpyañi maha jaa ke, yire sí n-kwò; nje yi jye wà jye na yi jaa mε, yire jye na nkwùu mε.

5

¹ Cyeere ti jye wuu na nke niñke na ke, tire na jye mu à jwo vùññɔ. Wuu à li cè na kuru ká jcwɔ,

Kile à baga niȝcɛnnɛ yaha wuu yahare e niȝyiȝi na, sùpya cye bà k'à kuru yaa mɛ, kuru ȝyɛ na ŋkɛɛge mɛ. ² Mâ wuu yaha kuru vùnŋke e, wuu na ŋkyèn, ȝaha na yɛ wuu la à sii si ŋkàre kuru bage e Kile yyére si cyere nivɔnnɔ ta. ³ Sèɛŋi na, wuu sí cyere nivɔnnɔ ta, wuu cyere baa wuu sɔ n-pyi mɛ. ⁴ Mâ wuu yaha kuru vùnŋke e, wuu na ŋkyaali maa ŋkyèn. Li ȝyɛ mu à jwo na wuu la na ȝyɛ Kile u tire cyeere láha wuu na mà dɛ! Wuu la na ȝyɛ u cyeere nivɔnnɛ bàra, tire ntemu ti ȝyɛ ti ȝyɛ na fwónre mɛ, bà tire si mpyi, cyeere ti ȝyɛ na fwónre ke, si tire fáa mɛ. ⁵ Kile yabiliȝi u à wuu dá tire cyeere nivɔnnɛ mɛɛ na. Ú à u Munaani kan wuu á. Lire e ke wuu à tɛɛn ná l'e na u sí tire cyeere nivɔnnɛ kan wuu á.

⁶ Lire kurugo wuu yákilibil'à tɛɛn tèrigii puni i, ali mà li ta wuu à cè na mà wuu yaha nte cyeere e, wuu ná Kafoonȝi laag'à tɔn wuye na. ⁷ Wuu ȝyɛ na u ȝaa mɛ, ŋka wuu à dá u na, maa ȝaare u kuni i. ⁸ Sèɛŋi na, wuu yákilibil'à sàa tɛɛn, wuu la mú sí ȝyɛ si fworɔ nte cyeere e si sà ntɛɛn Kafoonȝi yyére. ⁹ Lire l'à li ta, wuu à kàre Kafoonȝi yyére yo, wuu ȝyɛ niȝke na yo, wuu maha wuye waha maa u ȝyii karigii pyi. ¹⁰ ȝaha kurugo yɛ wuu pun'à yaa wuu sà yyére Kirisita yyahe taan, u u shin maha shin sàra u tàanna ná urufɔo kapyiȝkil'e niȝke na, katiigii bàra kapegigii na.

Kirisita à wuu ná Kile shwàhɔȝi yaa

¹¹ Lire kurugo wuu na fyáge Kafoonȝi na, maa Jwumpe Nintanmpe yu sùpyir'á, bà pi si mpyi si ȝyɛ pu na mɛ. Kile à wuu karigii puni cè. Mii na sòŋŋi na wuu kapyiȝkii na ȝyɛ yii funŋ'i mú. ¹² Wuu ȝyɛ

na puru yu si wuye cyêe yii na sahaŋki mε, ŋka wuu na pu yu si pyiŋkanna kan yii á, bà yii si mpyi si ñùñjirire ta wuu báaraŋi nimp̄yĩŋi kurugo mε. Lire pyiŋkanni na, karigii cyi ñyε na ñaa ke, mp̄ii pi ñyε na piye p̄êre ná cyire e maa niñyambaagii yaha ke, pire ká a yà yu yii na, yii sí tajwugo ta. ¹³ L'aha nta wuu fun̄nyi ñyε wuu á mε, kuru ñyε tapege mε, wuu ná Kile shw̄h̄l'e yire ñyε. Li mú sí ká nta na wuu fun̄nyi na ñyε wuu á, yii kurugo lir'á pyi. ¹⁴ Yii li cè na bà Kirisita à wuu kyaa táan uy'á mε, wuu na wuu karigii puni pyi kuru tàange kurugo. Wuu à dá li na na uru niñkin̄i u à kwû sùpyire puni cyaga, lir'á pyi mu à jwo ti pun'á kwû. ¹⁵ U à kwû sùpyire puni cyaga, bà li si mpyi mp̄ii pi ñyε shì na ke, pire kà ha raa pi ñyii karigii pyi sahaŋki mε, ŋka Kirisita u à kwû maa ñè pi kurugo ke, pi a pi karigii pyi pi a ntàanni ná uru ñyii wuuni i.

¹⁶ Lire kurugo numε, wuu saha ñyε na sùpya cwôre na ntàanni ná sùpyire sòññòŋkanni i mε. Tèni l'e, wuu mpyi a Kirisita cû mà tàanna ná sùpyire sòññòŋkanni i. Ŋka numε, wuu saha ñyε a u cû amuni mε. ¹⁷ Ngemu ká mpyi Kirisita wwoŋεge e ke, urufoo maha mpyi shinf̄ññò. U maha toroŋkanni niñjyeeni yaha, maa niw̄ññò lwó. ¹⁸⁻¹⁹ Cyire karigii pun'á fwordo Kile e. U à wuu ná uye shw̄h̄ñi yaa Kirisita cye kurugo, maa uru báaraŋi le wuu cye e na wuu a yi yu sùpyir'á, na Kirisita cye kurugo Kile à u ná sùpyire shw̄h̄ñi yaa. U saha ñyε a ti kapegigii wí kyaa mε. U à wuu tun na wuu a puru jwumpe yu sùpyir'á.

²⁰ Lire e ke wuu maha yu Kirisita cyaga numε. Li ñyε mu à jwo Kile yabilin̄i u ñyε na yu wuu cye

kurugo. Kirisita mege na, wuu na li caa yii á, yii yii ná Kile shwǎhǎni yaha u ɲwǎ. ²¹ Kirisita u ɲye u ɲye a kapii pyi mà ɲya me, Kile à uru pyi u à wuu kapegigii tugure lwǎ, bà wuu si mpyi si ntíi Kile yyahe taan Kirisita cye kurugo me.

6

¹ Wuu ná Kile na ɲye báarapyiɲεε. Lire kurugo wuu na li caa yii á, Kile à ɲwǎ yii na maa ndemu pyi yii á ke, yii àha lire yaha li pyi kaɲwǎɔ baa me.

² Yii li cè na Kile à jwo:

«Tèni l'á táan mii á ke, lire e mii à mu ɲarege shwǎ, zhwonji canɲke, mii à mu tɛge*.»

ɲye mii cìmpyiibii, yii lógo, Kile ɲyii tèni li ɲye numε, zhwonji canɲke ku ɲye ɲɲjaa.

³ Wuu la ɲye si wurugo sùpyani wà tufig'á, wà u kwǎ a ɲcɛge cyaga ta wuu báaraɲi na me. ⁴ Lire e wuu maha li cyêre wuu kapyiɲkii puni cye kurugo na wuu na ɲye Kile báarapyii. Wuu maha kyaage ná kanhare ná yyefuge kwú wuye e. ⁵ Bwǎɔnre yo, kàsuyiini yo, mà sùpyire sǎn a yaha wuu na yo, báarawayi yo, ɲǎmbaanji yo, ɲjyɲmbaanji yo, wuu maha cyire puni kwú wuye e. ⁶ Wuu na báare ná zǎvɲinre e, wuu à sèɲi cè. Wuu lùun'á táan, wuu zǎɲ'á ɲwǎ. Kile Munaani maha wuu tère, tàange sèe woge na ɲye wuu e. ⁷ Wuu na sèɲi jwumpe yu, Kile sífente na ɲye wuu á. Wuu à ntìɲi pyi wuu kàshikwǎnyaayi, si wuu zàmpɛɛnbii tùn, si wuye mâra. ⁸ Pii maha wuu père, pii maha wuu fare, pii maha wuu mɛpɛnge yîri, pii maha wuu mɛtange yîri. Pii maha sǎnɲi na wuu maha pire ɲwǎ fáanɲi,

* 6:2 Ezayi 49.8

mà li ta sèŋi wuu maha yu. ⁹ Pi maha piye pyi mu à jwo pi nyε a wuu cè mε, mà li ta sùpyire pun'à wuu cè. Pi maha wuu wí kwùu fiige, mà li ta wuu nyε nyii na. Pi maha wuu kyéree, ŋka wuu nyε a kwû mε. ¹⁰ Pi maha sônŋi na wuu yyah'à tanha, mà li ta wuu funntanga wuubii pi nyε tèrigii puni i. Pi maha wuu sônŋi fòŋɔfee, mà li ta wuu à shinnyahara pyi t'à pyi yaarafee. Pi maha sônŋi na yaaga nyε wuu cyε e mε, mà li ta yaayi puni nyε wuu wuyo.

¹¹ KƆrɛnti shiinbii, wuu à fínin'a jwo yii á. Wuu à yii kyaa táan wuy'á sèl'e. ¹² Wuu nyε a cyé si yii kyaa táan wuy'á mε, ŋka yii à cyé si wuu kyaa táan yiy'á. ¹³ Nyε mii na yu ná yii e mu à jwo mii pyii. Yii wuu kyaa táan yiy'á, bà wuu à yii kyaa táan wuy'á mε.

Mpii pi nyε pi nyε Kile kuni i ná yii e mε, yii yii karigii pyinƙanni cè ná pire e

¹⁴ Mpii pi nyε pi nyε Kile kuni i ná yii e mε, yii ná pire nyε a yaa yii pyi pwoo mε. Katiigii ná kapegigii sí n-jà n-shà kununi i la? Bèenmpe ná numpini sí n-jà n-shà sɔncyan la? ¹⁵ Wwoŋεεge ŋkire ku nyε Kirisita ná Sitaanniŋi shwɔhɔl'e yε? Mpii pi nyε pi nyε Kile kuni i mε, wwoŋεεge ŋkire ku nyε pire ná Kile kuni ŋaarafeebii shwɔhɔl'e yε? ¹⁶ Ngwòŋi ŋgire u nyε Kileŋaarebage ná kacycinmbage shwɔhɔl'e yε? Wuu pi nyε Kileni nyii wuŋi bage, bà Kile à yi jwo na:

«Mii sí n-tèen pi shwɔhɔl'e,
si mpyi ná pi e.

Mii sí n-pyi pi Kileni,

pi sí n-pyi mii shiinbii†.

¹⁷ Lire kurugo Kafoonji Kile à jwo:

“Yii fworó pi shwəhəl'e,

yii wâl'a láha pi na,

yii àha mbwə̀n yajwə̀hə̀ge kà tufiige na mε.

Lire ká mpyi, mii sí jεε yii na‡,

¹⁸ si mpyi yii Tunji,

yii sí n-pyi mii pùnampyire ná mii pùceepyire.”

Kafoonji Kile Sinji Punifoo u à jwo amuni.»

7

¹ Mii ntàannamacinmpyiibii, ná Kile s'à cyire jwə̀myahigii lwó wuu á, lire kurugo wuu wuu cyeere ná wuu zòmpyaagii fíninj'a yige kajwə̀hə̀yi puni i, wuu wuye waha wuu raa si yyaha na fyinmpe karigil'e, wuu raa jaare Kile yyahafyagare e.

Poli funntange jùnjke

² Wuu na li caa yii á, yii jεε wuu na. Wuu jye a kapyimbaala pyi wà na mε, wuu jye a wà wuu kèεge mε, wuu mú jye a wà yaaga nàjwə̀hə̀rə̀ mε.

³ Puru kajwuuni bà li jye si yii cèεge mà dε! Mii à fyànha a yi jwo yii á, na yii kyal'à táan wuu á sèl'e. Yafyin si n-jà wuu láha wuye na dijnyenji i mε, ali kwùnjí mú si n-jà mε. ⁴ Mii à sàa dá yii na, maa naye pèe ná yii kani i sèl'e. Numε, mii yákilinj'à tèn sèl'e. Wuu mée jye yyefuge e ke, mii funnj'k'à táan sèl'e.

⁵ Sèenji na, mà lwó wuu à nɔ Masedoni kùluni i ke, wuu jye a yyenijε ta mε. Yyefuge shinjí puni na jye wuu na. Pi mpyi na yoge kwùun wuu na kàmpanjyi

† 6:16 Levitiki 26.12; Zheremi 32.38; Ezekiyeli 37.27 ‡ 6:17 Ezayi 52.11

puni na, fyangare sí mpyi wuu e. ⁶ Nka Kile u maha cwònròmáfeebii fònn̄i ke, uru u à wuu fònn̄o Titi mpañi cye kurugo. ⁷ Nyε Titi mpañi kanni bà με, ηka yii kan'à u funηke ηίηε ηιηεηkanni ndemu na ke, lir'à wuu puni funηyi ηίηε mú. U à yi jwo wuu á na mii seepenge na wá yii na, na kani li mpyi a pyi ke, na lir'à yii yyahayi tanha, na numε yii à mii kani cû ná yii cyeyi shuunniñi i. Lir'à là bâra mii funntange na.

⁸ Letεreñi mii à tùugo yii á ke, u jwumpe mén'à yii yyahayi tanha ke, mii ηyε a naye cêεγε με. Mii mpyi na ηko si naye cêεγε tēni l'e li mpyiñi i, paha na ye mii à li cè na u mpyi a yii yyahayi tanha, ηka lir'à pyi tère nimbilere funη'i kanni. ⁹ Lire e mii funntanga wu u ηyε numε. Yii yyetanhare bà t'à mii funηke táan με, ηka l'à pyi kaηηo mà yii pyi yii à yii toronkanni kêεηηε ke, lire l'à mii funηke táan. Yii yyahay'à tanha mà tàanna ná Kile ηyii wuuni i, lire e ke, nde wuu à pyi yii na ke, lire ηyε a para με. ¹⁰ Yii li cè na yyetanhare t'à sùpyañi ta mà tàanna ná Kile ηyii wuuni i ke, tire maha u pyi u à u toronkanni kêεηηε maa shwō. Maye ηcêεγε ηyε lire e με. Nka yyetanhare ntemu ká mpyi ηge diηyεñi woro ke, tire maha kwùñi nō sùpyañi na. ¹¹ Yyetanha kani l'à yii ta mà tàanna ná Kile ηyii wuuni i ke, lir'à ηkêεηñi ηgemu lēηε yii karigil'e numε ke, yii uru kàanmucya. Kani l'à pyi yii shwōhəl'e ke, yii à li lwó yiye e si wenkuro kwòn lire na numε. Lire kanni bà με, yii à li cyêe na yii saha ηyε a ηεε lire kapiini pyifooni na yiye shwōhəl'e με. Lire kan'à sàa yii lùuni yîrige. Yii mú à fyá sèl'e. Yii la mpyi a sì si núru mii ηya, yii à yii

pèrege pyi maa lire kani pyifoonji tòn. Yii à li cyêe pyiŋkannigii puni na, na yii à yiye fíniŋ'a yige lire kani i. ¹² Lire e mii nyε a mpyi a letεeŋi tùugo yii á, kapiini pyifoonji, lire nyε mε l'à pyi ngemu na ke, pire wà kurugo mε. Yii à wuu kani cû ná yii cyeyi shuunniŋi i pyiŋkanni ndemu na Kile yyahe taan ke, mii mpyi a u tùugo yii á, yii puni si lire cè. ¹³ Lire l'à wuu funnyi pyi y'à níŋε.

Lire kanni bà mε, ŋka yii à Titi yákiliŋi tiŋε tiŋεŋkanni ndemu na, ka u u yîri yii yyére ná funntange ŋkemu i ke, lir'à wuu funnyi pyi y'à táan sèe sèl'e mú. ¹⁴ Mii à yii metanga yyere u á, yii mú nyε a mii sílege mε. Yaaga maha yaaga wuu à jwo yii á ke, yir'à pa nta sèe. Amuni, ŋje wuu à jwo Titi á yii kyaa na ke, yire mú à pa nta sèe. ¹⁵ Tèni i u à shà yii yyére ke, yii à u ŋwɔmεeni cû, maa u cùmu lemε ŋwɔ pèente funŋke e pyiŋkanni ndemu na ke, u funŋɔ nyε à wwò lire na mε, lir'à là bâra u tàange na mà yyaha tí ná yii e. ¹⁶ Mii funntanga wu u nyε, ŋaha na ye mii sí n-jà n-dá yii na karigii puni i.

8

Ntègeŋi Kòrenti dánafeebil'à pyi Zheruzalemu wu-ubil'á ke

¹ Mii cìnmpyiibii, Kile à ŋwɔ Masedoni kùluni dánafeebii na ŋwɔŋkanni ndemu na ke, wuu sí lire yyaha jwo yii á. ² Pi à kyaala sèl'e, ŋka pi funnyi mpyi a táan sèl'e. Kuru funntange kurugo, ali mà li ta fòŋfee pi à sii pi pi, Kile wuubii pi nyε Zheruzalemu kànhe e ke, pi à ŋkanŋi pyi sèl'e pir'á. ³ Sèeŋi na mii sí yi jwo yii á, pi à pi pèrege pyi, pi bá à tòro pi pèrege taan. Wà bà u à fànha cyán pi na

mà dè! Pi à li lwó piye e. ⁴ Pi à sàa wuu jáare, na Kile wuubii pi nyε Zheruzalēmu i ke, na wuu kuni kan pir'á, pire mú si pi tège. ⁵ Lire kanni bà pi à pyi mε, Kafoonji á pi à piye kan yyecyiige na, maa nta a piye kan wuu á mà tàanna ná Kile nyii wuuni i. Lire pi à pyi ke, lir'à tòro wuu sònṅṅkanni taan. ⁶ Lire kurugo wuu à li cya Titi á u shà yii yyére, báaraṅi niṅcɛnṅi jwɔ u à cù na yii wyérenji bínnini ke, u u sà uru fũṅṅ. ⁷ Dániyaṅi i yo, Kile Jwumpe njwuṅi i yo, jɛnṅi i yo, mà karigii puni pyi ná sèl'e yo, mà wuu kyaa táan yiy'á sèl'e, bà wuu à yii kyaa táan wuy'á sèl'e mε, yii a sàa jwɔ cyire karigii puni i. Nyε bà yii à jwɔ cyire karigil'e mε, yii yiye waha yii i mpyi amuni ṅge wyérenji ṅkanṅi kãmpañke na mú.

⁸ Fànha bà mii nyε na ṅko si ncyán yii na mà dè! Pi sanmpil'à piye waha maa ndemu pyi ke, lire mii nyε na yu yii á, si yii tàange kàanmucya kampyi tàange sèe wogo ku nyε ku ki. ⁹ Wuu Kafoonji Yesu Kirisita à jwɔ yii na jwṅṅkanni ndemu na ke, yii à lire cè. Pèente ná yaayi puni mpyi u á, ṅka yii kurugo, u à cyé yire puni na, bà yii si mpyi si Kile yaayi niṅcɛnṅi ta mε.

¹⁰⁻¹¹ Nyε na taṅyage mii sí n-jwo yii á. Yii à fyánha a uru wyérenji mbìnniṅi kani sònṅ'a ta, maa li jwɔ cù taṅjyee. Lire e numε, mii na sònṅi yii aha lire kani pyi mà nɔ li tɛgeni na, lire sí n-pwóro. Yii li pyi ná uru yákiliṅi niṅcɛnṅi i, ṅgemu i yii à li jwɔ cù ke, yii tàanna ná yii pèrege e. ¹² Sùpya la ká mpyi si kyaa pyi uye e Kile kurugo, lir'à táan Kile á. ṅka u pèrege nyε ṅkemu ke, kuru na Kile maha jɛcáa. ṅke ku nyε ku nyε u á mε, Kile sì kuru cya u á mε.

¹³ Mii nyε a jwo na yii pi sanmpii wuuni njaaṅi

tèg'a yii wuuni kèege mε, ηka mii la ηye sùpyire puni si ntàanna. ¹⁴ Sí na ηye yii na nijjaa, lire e ke, mpii pi ηye sí baa ke, yii pire tège. Sí ká mpa mpyi pire na canηka mà yii ta sí baa, pire sí n-jà yii tège. Lire ká mpyi, yii puni sí n-tàanna, ¹⁵ bà y'à séme Kile Jwumpe Semεηi i mε, na:

«ηgemu u à yalyire nijyahara kuu ke, uru woore paanga ηye a kwôro mε; ηgemu u à nimpigere kuu ke, uru woore mú ηye a u kùuηo mε*.»

¹⁶ Wuu à fwù kan Kile á, u à Titi pyi u à yii kani cù ná u cyeyi shuunnij i wuu fiige. ¹⁷ Wuu à li cya u á, u sà fwordo yii na, ka u u ηεε, ηka lire mpyi a u ta u à li lwó uye e mà kwò, nahà na ye li mpyi a sàa táan u e. ¹⁸ U ná wuu cìmpworonaηi wà wuu sí n-tun yii yyére. Dánafeebii kuruyi puni na uru cìmpworonaηi kère Jwumpe Nintanmpe ηjwuηi kurugo. ¹⁹ Mà bàra lire na, dánafeebii kuruy'á u le ná wuu e wuu kùsheηεε lire wyére binnini na. Wuu na uru báaraηi nijcεnηi pyi Kafoonηi pèente kurugo, si li cyêe na wuu la na ηye si wuu cìmpyiibii tège.

²⁰ Wuu à kuru wyéreηyahage karigii cwœnro amuni, bà li si mpyi wà kà ηkwò cwò cyaga ta wuu báaraηi na mε. ²¹ Wuu la ηye s'a wuu karigii pyi ntijηi i Kafoonηi yyahe taan kanna mε, ηka sùpyire yyahe taan mú.

²² Wuu sí wuu cìmpworonaηi wabεε bàra pi na si ntun yii á. Wuu à uru ηge kàanmucya kari ηiyahagil'e, mà li ηya na u à uye kan Kile báaraη'á. U bá à là bàra u uye kanηkanni na báaraη'á numε, nahà na ye u à dá yii na sèl'e. ²³ Titi

* **8:15** Ekizodi 16.18

wi ke, uru na nyε mii wwoηεε ná mii báarapyηεε. Wuu na báare yii á. Dánafeebii kuruyi y'à wuu cìmpyiibii mpii shuunniηi tun. Pi na báaraηi pyi Kirisita mεge mpèeηi kurugo. ²⁴ Lire kurugo yii li cyêe pi na na pi kyal'à táan yii á, dánafeebii kuruyi y'à pi tun ke, yire si ηcè na wuu nyε na yii kêre tawage e mε.

9

¹ Nyε wyéεηi yii nyε na bínnini si ntège Zheruzalemu shiinbii tège ke, ηùηo saha nyε mii i yà jwo yii á uru kyaa na mε. ² Naha na ye funηcεηηke ku nyε yii á uru báaraηi mεε na ke, mii à ku cè. Mii à yii metanga yyere kuru kyaa na Masedoni dánafeebii shwòhòl'e. Mii à yi jwo pi á na mà lwó fo tanjyee na, Akayi kùluni dánafeebil'à bégele si Kile wuubii tège Zheruzalemu i. Kuru funηcεηηke ku nyε yii á ke, kur'à màban le pi shinnyahar'e pi à ntègeηi pyi sèl'e.

³ Lire ná li wuuni mú i, mii sí mpii cìmpyiibii tun yii yyéε, ηkèeηi nimbwoηi yii à ta ηge wyéεηi kyaa na ke, uru kà mpyi laaga baa mε, pi i sà yii ta yii à bégele bà mii mpyi a yi jwo mε. ⁴ Ná lire bà mε, Masedoni dánafeebii pìi ká shà ná mii i, mà sà li ta yii nyε a bégele mε, ku sí n-pyi silege wuu á, ηka yii wuuni cye sí n-tòro. ⁵ Lire e mii à li nya na mii à yaa mii i mpii cìmpyiibii ηáare, pi raa wá na yyaha na yii yyéε, wyéεηi ηwòmεεni yii à lwó ke, pi i sà uru karigii cwònrò mà jwo mii u nò wani ke. Lire sí li cyêe na yii à u kan ná funηo niηkin i, mà ta fànha nyε a cyán yii na mε.

⁶ Yii li cè na mu aha sùmashi nimpigere nùgo, sùma nimpigere mu maha ηkwòn. Mu sí kà

nijyahawa nûgo, mu maha nijyahawa kwòn.
 7 Pèerege shin maha shin à lwó uye funḡ'i si ḡkan ke, urufoo u kuru kan. U li pyi ná funntange e, l'aha mpyi mu à jwo fànha kyaa mε, ḡaha na ye shinḡi u à ḡkanḡi pyi ná funntange e ke, uru kyaa li maha ntáan Kile á. 8 Síḡi na ḡye Kile á sí kacεḡḡkii shinḡi puni pyi yii á, bà yii si mpyi s'a yii màkwuḡwóyaayi puni taa tèrigii puni i fo si shinḡyahara tège tegeḡkannigii nijyahagii na, 9 bà y'à séme Kile Jwumpe Semεḡi i sùpyaḡi nijcεḡḡi kyaa na mε na:

«U maha fòḡfeebii kaan sèl'e,

u cènmpe ḡye a sìi na ḡkwùu mε*.»

10 Kile u maha sùmashinḡi kaan faapyinḡ'á, maa ya-lyire kaan u á ke, uru sí yii cyeyaayi ḡyaha mú, bà pi sanmpii si mpyi s'a yaaya nijyahaya taa yii á mε. 11 Yii sí yaayi shinḡi puni ta, bà yii si mpyi s'a pi sanmpii kaan sèl'e tèrigii puni i mε. Lire ká mpyi, wyéḡḡḡi yii sí n-kan wuu sà ḡkan ke, shinḡyahara sí fwù kan Kile á uru kyaa na. 12 Uru wyéḡḡḡi yii sí n-bínni ke, uru sí Kile wuubii wuuni ḡwó Zheruzalemu kànhe e. Lire kanni bà mε, li sí n-pyi kaḡuḡo pi si fwù kan Kile á sèl'e. 13 Pi aha uru ntéḡḡḡi ta, pi sí Kile kêe, ḡaha na ye pi sí li cè na Jwumpe Nintanmpe p'à yyaha tíi ná Kirisita e ke, na yii à dá puru na, maa pu kurigii ḡaare, maa yii cyeyaayi táali sèl'e ná pi e, mà bàra sùpyire sannte na. 14 Nwḡḡkanni na Kile à sàa ḡwó yii na ke, lire kurugo pi sí raa Kile ḡáare yii á, si yii kyaa táan piy'á sèl'e.

* 9:9 Zaburu 112.9

¹⁵ Nye mii c̀nmpyiibii, Kile à yabwòhe ñkemu kan wuu á mana, ná sùpya s̀i n-jà yi yyaha jwo mε, wuu u p̀e kuru kurugo.

10

Poli à uye tànga jwo u t̀nnture báarañi i

¹ Mii c̀nmpyiibii, p̀il'à jwo na mii Poli ká mpyi yii shwòhòl'e, mii maha mpyi fyagarafoo, ñka mii aha mpyi latònge e, mii maha mpyi nò. Mii na li caa yii á Kirisita ñ̀mpin̄ke ná u c̀nmpε kurugo, ² mii aha nò wani yii yyére, mii la ñye s̀i sà jwuᅅgama jwo yii na mε. Ñka mp̄ii pi ñye na ñko na wuu na wuu karigii pyi mà tàanna ná s̀pyire s̀on̄on̄kanni i ke, mii kòni sí n-sà jwuᅅgama jwo pire na. ³ Sèe w̄i, wuu puni na ñye s̀pyii, ñka kàshige wuu ñye na ñkẁun ke, wuu ñye na ku kẁun mà tàanna ná s̀pyire s̀on̄on̄kanni i mε. ⁴ Naha na ye wuu kàshikw̄nyaayi ñye a ȳri s̀pyire yyére mε, Kile yabiliñi fanh̄anyahaga yaaya yi. Wuu maha Sitaanniñi f̀nhe k̀eεge ná y'e, ñaha na ye wuu maha s̀pyire s̀on̄ore laaga baa woore shi tò. ⁵ Yampeente jwumpe pu maha s̀pyire sige ti si Kile c̀e mε, wuu maha ñεε puru pà tufige na mε. Wuu maha s̀pyire s̀on̄ore puni k̀en̄ñi, bà ti si mpyi si ñεε Kirisita na mε. ⁶ Yii aha u ñw̄mεeni c̀u karigii puni i t̀eni ndemu i ke, mp̄ii pi sí n-cyè u na ke, wuu sí pire t̀un.

⁷ Yii maha karigii cẁore cyi ñyan̄kanni na, mà ta yii ñye a cyi ñwòhe c̀e mε. Yii wà ká nta u à dá li na na uru na ñye Kirisita wu, urufoo u li c̀e na bà uru ñye Kirisita wu mε, amuni wuu mú ñye. ⁸ F̀nhe Kafoon̄i à kan wuu á ke, mii m̀eε ká nta mii i ñko

si naye p̄e si ntòro ná kuru kani i, kuru silege nȳe mii na m̄e. Kuru fành'à kan wuu á, si yii tège yii a si yyaha na Kile kuni i, ku nȳe a kan wuu á si yii wuuni k̄ege m̄e. ⁹ Yii àha raa s̄on̄ji na mii à na let̄eribii t̄uḡo yii á si yii pyi yii fyá m̄e. ¹⁰ Naha na ye p̄il'à jwo na mii let̄eribii jwumpe fành'à nyaha maa súuli, ñka na mii aha mpyi yii shw̄h̄al'e, mii fànhe maha ñcȳere, mii j̄in'à jwuntarama jwo m̄e. ¹¹ Pirefee pi li c̄e, bà wuu à yi jwo wuu let̄eribil'e m̄e, wuu aha n̄o wani, amuni wuu sí li pyi.

¹² Mpii pi maha piye k̄ere ke, taha yii na s̄on̄ji na wuu nȳe pire fiige? Wuu si ñēe wuye tàanna ná pi e m̄e! Pi maha piye tàanni ná piye e, maa piye wíi. Lir'à li cȳe na pi nȳe a cȳige m̄e. ¹³ Wuu pi ke, wuu nȳe na wuye dùruge na nt̄uuli wuu p̄erege taan m̄e. Báarañi Kile à le wuu cye e, ná yii mú na nȳe u e ke, ur'à láha cyage ñkemu i ke, wani wuu maha wuye dùrug'à láha. ¹⁴ Wuu pi à pyi shincyibii mà Jwumpe Nintanmpe jwo yii á Kirisita kyaa na. Lire e ke wuu à n̄o wani yii yȳere ke, wuu saha nȳe a tòro wuu t̄egeni taan m̄e. ¹⁵ Lire e wuu nȳe a tòro wuu báarañi t̄egeni taan, mà sà pi sanmpii wuñi lwó, si wuye p̄e ná ur'e m̄e. Yii d̄aniyañi ká mpa mp̄e, wuu na s̄on̄ji wuu báarañi sí n-shà yyaha na yii yȳere, si nt̄aanna ná Kile u t̄egeni ñ̄ncyeeni i. ¹⁶ Lire ká mpyi, k̄irigii cyi nȳe yii k̄antuḡo ke, wuu sí n-jà Jwumpe Nintanmpe caala si n̄o cyire e, mà ta wuu nȳe a wuye p̄e ná piiberii báara nimp̄yi i m̄e.

¹⁷ Y'à séme Kile Jwumpe Sem̄eñi i na: «ñgemu la ká mpyi si p̄ene taha yaaga na ke, urufoo u ti taha

Kafoonji Kile na* .» 18 Yii li cè, sùpɔɔnɔɔ u nyɛ na uye metanga yu ke, Kafoonji Kile sì nyɛ urufoo na mɛ, u yabiliɔɔ na nyɛmetanga yu ke, uru na u maha nyɛ.

11

Poli ná tūntunmpii kafnivinibii kani

1 Ei! Mii cɔnmpyibii, kampyi yii mpyi na sí nyɛ mii sɔncompe kwú yiye e tère nimbilere e, lire mpyi na sí n-táan mii i. Nyɛ yii pu kwú yiye e. 2 Yii tãange na nyɛ mii i fo mà pyi yɔɔcyɛɛ, lire s'à fworɔ Kile e, naha na ye li na nyɛ mu à jwo mii à yii cū nò niɔkin mɛ na, uru u nyɛ Kirisita. Mii la nyɛ si yii kan u á pùcepyinɔcembaala fiige. 3 Nka mii na fyáge yii yákilibii ká nyɛwò nyɛnyɛ, pɔwɔnyɛnɔnɔ na yii à yiye pɔwò Kirisita na ke, yii i lire yaha, bà wɔwò'á cɔwòre tɛg'a Awa nyɛwò fáanɔa a wurugo mɛ. 4 Naha na ye mii à li nya na wà ká mpa yabere jwo yii á Yesu kyaa na nyɛmɛ yi nyɛ yi ná wuu wuyi nyɛ niɔkin mɛ, yii maha nyɛ yire na. Wà mú ká múnaani labere kyaa jwo yii á ndemu li nyɛ li ná yii zòmɔpyaagii funɔ wuuni nyɛ niɔkin mɛ, lire nyɛ mɛ mà jwumpe nintanmpe pabere jwo yii á, mpemu pu nyɛ pu ná wuu wumpe nyɛ niɔkin mɛ, yii maha ntíl'a dá puru na, 5 mà li ta, pire yii nyɛ na sɔnyɛ tūntunmii, maa sɔnyɛ mɛgɛfee pi ke, mii á pi nyɛ a pɔwò mii na cyaga maha cyag'e mɛ. 6 Ali mii mɛ ká mpyi mii nyɛ a jwumpe cè sèl'e mɛ, nde li nyɛ nyɛni kuni ke, mii à là cè lire e. Wuu à lire cyɛe yii na pyɛnyɛnɔnɔ puni ná karigii puni i.

* 10:17 Zheremi 9.23

⁷ Mii à Jwumpe Nintanmpe jwo yii á mana, mii nyε a yafyin cya yii á mε. Lir'à li cyêe na mii à naye tírige maa yii dùrugo. Lire na nyε kapyimbaala la? ⁸ Mii à nyε dánafeebii kuruṅyi yà cyeyaaya na, maa nyε pi i mii sâra, bà mii si mpyi si jà raa báare yii á mε. ⁹ Tèni i mii mpyi yii yyére ke, mii cyεge mpyi a kùṅṅ, ṅka mii nyε a nyen'a naye tíṅge yii wà na mε. Yaayi kani li mpyi mii na ke, cìmpyiibii pi à yîri Masedoni kùluni i ke, pir'à pa yire kan mii á. Mii nyε a sàa nyε mà na tugure tège yii wà ṅṅ'i mε, mii mú sî ti tège yii wà ṅṅ'i mε. ¹⁰ Lir'à pyi kaṅṅṅ mà mii ṅṅke yîrige. Akayi kùluni puni i, sùpya sî n-jà lire wwú mii i mε. Mii na puru yu mà taha Kirisita sèṅi na, uru sèṅi u nyε mii zòmbilini i. ¹¹ Mii à jwo na mii nyε a nyen'a na tugure tège yii ṅṅ'i mε, lir'à li cyêe na yii kyal'à pēn mii á la? Kile à li cè na yii kyal'à táan mii á.

¹² Nyε mii sí raa na báaraṅi pyi bà mii à tēe na u pyi mε, bà li si mpyi, tūntunmpii pi nyε na piye pēre na pire na nyε wuu fiige ke, pire kà n-jà raa piye tàanni ná wuu e mε. ¹³ Tūntunmii kafinivinimii pi. Pi maha sùpyire wuruge, maa piye pyi mu à jwo Kirisita tūntunmii. ¹⁴ Li nyε a sàa pāa wuu e mε, ṅaha na ye Sitaanniṅi yabilinṅi maha uye pyi bēenmpe mèlεke fiige. ¹⁵ Lire e ke l'àha yii pāa si Sitaanniṅi báarapyiibii ṅya pi à piye pyi báarapyii sèe wuu fiige mε. Yii li cè na Kile sí n-pa pi puni sâra si ntàanna ná pi kapyinṅkil'e.

¹⁶ Mii sí yi taha yii á, wà tufige kà n-si raa sōṅṅi na sicyere ti nyε mii i mε. ṅka yii mée ká nta yii sōṅṅi na mii na nyε sicyerefoo, yii nyε na sicyeere na tère nimbilere funṅ'i, bà mii si mpyi si naye pēe mε.

¹⁷ Mpe mii sí n-jwo numε ke, Kafoonji bà u à puru jwo a kan mii á mε. Mii sí n-jwo sicyerefoo fiige.

¹⁸ Ná shinnyahara s'à tiye pēe mà tàanna ná sùpyire pyinƙanni i, mii mú sí naye pēe, ¹⁹ ƙaha na yε yii maha sicyerefeebii karigii kwú yiye e jwuɲyahama baa, mà li ta yii na sônɲi na yii na ɲyε yákilifee.

²⁰ Tire sùpyire ti maha yii cû bilii fiige, maa yii cyeyaayi lyí, maa yii nàɲwəhəre, maa piye pēre yii na, maa yii bwùun yii yyahayi i ke, yii maha tire karigii kwú yiye e. ²¹ Wuu ɲyε a ɲen'a lire fiige pyi mε, lire na yii ɲyε na wuu sônɲi fànha baa shiin la? Tá kur'à yaa ku pyi wuu á silege?

Mii sí n-jwo mu à jwo sicyerefoo. Pi sanmpii maha piye pēe ná ndemu i ke, mii mú sí n-jà naye pēe ná lire e. ²² Pi aha jwo na pire na ɲyε Eburu shiin, mii mú na ɲyε uru wà. Pi aha jwo na pire na ɲyε Izirayeli shiin, mii mú na ɲyε uru wà. Pi aha jwo na pire na ɲyε Ibirayima tùluge shiin, mii mú na ɲyε uru wà. ²³ Pi aha jwo na pire na ɲyε Kirisita báarapyii, mii na ɲyε Kirisita báarapyi mà tòro pi taan. Mii na yu ɲùmbwuyirilifoo fiige. Mii à báaraɲi pyi mà tòro pi taan, mii kàsɲi jyìgil'à ɲyaha pi wogigii na, mii bwəɲre nizhwəɲr'à sàa ɲyaha. Mii múnaan'à pyi kwùɲi ɲwəge e tooyi ɲjemu i ke, yir'à ɲyaha pi wuyi na. ²⁴ Yahutuubii pìl'à mii bwèn fo tooyo ƙaɲkuro, təɔgə maha təɔgə tiripaanni ɲèe beɲjaaga ná ƙε ná baacyεere pi à le mii i. ²⁵ Ɔrəmu fànhafeebil'à mii bwèn tooyo taanre ná kàbil'e. Təɔge k'e, sùpyir'à mii wà si mbò ná kafaayi i. Bakwəɔg'à kèege ná mii i tooyo taanre suumpe lwəhe ɲuɲ'i. Mii à canmbile niɲkin ná numpilaga niɲkin pyi suumpe lwəhe niɲke e. ²⁶ Mii

à kùshégii níjyahagii pyi, cyire tooy'e, mii múnaani mpyi kwùñi ñwǎge e mu à jwo: lwǎhe tajyiilige e ná nǎñkaabii cye e ná mii shíñi sùpyiibii ná supyishíñi sanñi wuubii cye e. Kǎnhe e yo, sige e yo, suumpe lwǎhe ñun'i yo, mii cínmpyiibii pi à piye pyi dánafee mà ta dánafee bà mε, pire cye e yo, mii múnaani mpyi kwùñi ñwǎge e. ²⁷ Mii à báarañi pyi sèl'e, maa kǎnhare kwú naye e. Mii à numpiliye níjyahaya pyi mii ñyε a ñóó mε. Mii à katege ná byage shwǎ. Tèrii níjyahagil'e, mii maha ñjyì ta mε. Mii à wyeere shwǎ, vǎanya mpyi mii á mε. ²⁸ Mà bàra yire puni na, canña maha canña mii funñk'à pεn ná dánafeebii kuruñyi puni i. ²⁹ Wǎ fǎnha ká nta k'à cyéε, mii woge mú à cyéε. Wǎ ká kapii pyi, lire maha waha mii na sèl'e.

³⁰ Kampyi mii à yaa mii i naye pèe, mii sí naye pèe na fǎnhañcyerere kurugo. ³¹ Kile u ñyε Kafoonji Yesu Kirisita Tunji ke, ur'à li cè na mii ñyε a finε mε. Uru u à yaa ná pèente e tèrigii puni i fo tèekwombaa. ³² Mà mii yaha Damasi kǎnhe e, fǎnhafoonji u mpyi na saanñi Aretasi karigii cwǎonre kuru kǎnhe e ke, uru mpyi a pìi yaha pi a tajyiñwǎyi kǎanmucaa, bà pi si mpyi si mii ta ñcû mε. ³³ Nka dánafeebil'à mii le shàhal'e mà yige ñkununke wyige e, kǎnhe kǎntugo. Lire l'à pyi mii shwonkanni.

12

Karigii Kile à cyêe Poli na ke

¹ Fo mii i naye pèe, ali mà li ta kǎñwǎo ñyε lire na mε. Lire e ke karigii Kafoonji à cyêe mii na, maa ñcèñi ñgemu kǎn mii á ke, mii sí yà jwo yire e numε.

² Mii à nàṅi wà cè*, ṅgemu u à dá Kirisita na ke, Kile à u lwó a kàre nìnyinṅi tanrewuṅi i†, li yyee ke ná sicyere u ṅye ṅge. Lir'à pyi mà uru nàṅi ta ná u cyeere e yo, l'à pyi mà u ta u cyeere baa yo, mii ṅye a cè me, Kile kanni u à yire cè. ³ Mii kòn'à cè na uru nàṅ'à shà Arijinanṅi i maa mpa. Lir'à pyi mà u ta ná u cyeere e yo, l'à pyi mà u ta u cyeere baa yo, mii ṅye a cè me, Kile kanni u à yire cè. ⁴ U à shà Arijinanṅi i maa jwumpe mpemu lógo ke, puru yyaha sì n-jà n-jwo me, sùpya bà ṅye a yaa u a puru jwumpe yu u ṅwoge e me. ⁵ ṅye mii sí n-jà naye pèe si li cyèe na mii u ṅye uru nàṅi, ṅka mii sì lire pyi me. Mii aha a si naye pèe, karigii cyi ṅye na mii fànhe ṅcyèrenṅi cyèe ke, cyire kanni kàmpañke na mii sí naye pèe. ⁶ Mii la méε ká mpyi si naye pèe, tire ṅye sicyere me, ṅaha na ye sèenṅi mii sí n-jwo. ṅka mii sì lire pyi me, ṅaha na ye mii na ndemu pyi, maa ṅjemu yu ke, mii la na ṅye sùpyire ti mii cú a tàanna ná yire e kanni. ⁷ Mii la ṅye sùpyire ti pèenε taha mii na, mà li ṅuṅke pyi na mii à kakyanhala karii ṅya me.

Lire e Kile à yyefuge kà tège mii ṅuṅ'i, bà ṅguro maha sùpya súuli u cyeere e me. Li ṅye mu à jwo Sitaanniṅi tūnntunṅi wà u à yyefuge yaha mii na, bà li si mpyi, mii àha naye pèe me. ⁸ Mii à Kafoonṅi ṅáare tooyo taanre, u kuru yyefuge láha na na, ṅka u ṅye a ṅεε me, ⁹ maa mii ṅwə shwə na ur'à cènmpe mpemu pyi mii á ke, na puru sí mii ta, ṅaha na ye tènì i sùpyanṅi fàn'h'à cyéε ke, lire tènì i uru fànhe

* **12:2** Poli ká jwo na ur'à Kirisita cyelempyanṅi wà cè, uye kyaa na u ṅye. † **12:2** Nìnyinṅi tanrewuṅi u ṅye nìnyinṅi teganì. Mà tàanna ná Yahutuubii sònṅanṅkanni i, kuru cyage e Kile à tèn, pi maha ku pyi Arijinanṅi mú.

maha kuye yal'a cyêe. Lire kurugo li maha ntáan mii á mà naye dùrugo na fânhaŋcyereere tèni i, bà Kirisita fânhe si mpyi si tateenge wwû mii i me. ¹⁰ Lire e mii fânhe ká ŋcyére, lire ŋye me pi aha mii cyahala, lire ŋye me mà kawaa pyi mii na, lire ŋye me mà mii kyérege, lire ŋye me mà nàvunŋo kyaa pyi mii na Kirisita kurugo, li maha ntáan mii i, ŋaha na ye lire tèni i Kirisita maha u fânhe le mii i.

Kōrenti shiinbii kan'à Poli funŋo pen

¹¹ Tèni i mii mpyi a naye pêe ke, mii mpyi na yu sicyerefoo fiige, ŋka yii pi à mii pyi mii à li pyi. Yii pi mpyi a yaa yii a mii metange yu, ŋaha na ye li méé ká nta na mii ŋye yaaga me, pire tūntunmpii yii ŋye na sŋnŋi shinbwoo ke, pi ŋye a pwórɔ mii na yafyin kàmpañja na me. ¹² Karigii cyi à li cyêe na mii na ŋye Yesu tūntunŋo ke, mii mpyi a naye waha maa cyire pyi yii shwəhəl'e. Yii à Kile sífente fyèŋi ná kabwəhigii ná kakyanhala karii niŋyahagii ŋya mii cye kurugo. ¹³ Mii ŋye a na tugure yaha yii ŋun'i me, lire kanni baare e, ŋaha mii à pyi dánafeebii kurunyi sanŋy'á ná mii ŋye a li fiige pyi yii á mà ye? Yii tanga ku ŋye mii na, yii yàfa na ná.

¹⁴ Yii wíi, na tontanrewog'á mii ŋye na si wani yii yyére, ŋka mii méé si na tugure yaha yii ŋun'i me, ŋaha na ye yii cyeyaayi kurugo bà mii ŋye me, yii yabilimpíi kurugo mii ŋye. Pyìbilere ŋye na wyére caa na li sifeebii ŋwɔ caa me, ŋka sifeebii pi maha wyérenŋi caa na pyìbileni ŋwɔ caa. ¹⁵ Mii wi ke, mii sí ŋee na cyeyaayi puni kan yii kurugo ná funntange e, si naye kan ntaha yi na mú. ŋye mii aha yii kyaa

táan nay'á amuni, lire li sí yii pyi na yii àha mii kyaa táan yiy'á sahan̄ki mà?

16 Yii à li cè na mii ɲye a naye tíɲe wà tufiige na me, ɲka yii p̄i saha na ɲko na mii à cɲlige de, na mii à yii wyéɛɲi wà lyí s̄ɲcyiimpe e. 17 Lire e ke mpii mii à tun yii á ke, pire wà à yii yaaga n̄ɲwɔhɔr'a pa ɲkan mii á la? 18 Mii à li cya Titi† á, u shà yii yyére ná wuu c̄ɲmpworon̄ɲi i. Taha Titi à yii wyéɛ n̄ɲwɔhɔrɔ la? Taha mii ná Titi s̄ɲɲɔɲkanni wá n̄ɲkin karigil'e me? Taha wuu ɲaraan̄kanni wá n̄ɲkin me?

19 Mà lwó t̄em̄oni i, yii na s̄ɲɲi na t̄anga wuu ɲye na ɲcaa yii á, lire sí bà me. Wuu maha yu Kile yyahe taan, Kirisita wwoɲeɛge e. Wuu nt̄annamacin̄mpyiibii, yaaga maha yaaga wuu à jwo ke, wuu à yire puni jwo, bà yii si mpyi s'a s̄i yyaha na Kile kuni i me. 20 Mii na fyáge si zhà yii yyére, mii àha ɲkwò sà yii ta yii à pyiɲkanni labere lwó ndemu li ɲye li ɲye a táan mii á me. Lire baare e nde mii sí n-pyi ke, lire mú s̄i n-táan yii á me. Lire ɲwɔhe ku ɲye, mii na fyáge, mii àha ɲkwò zà mb̄embaan̄i ná ȳɲcyɛge ná l̄uyirini ná ɲyip̄ɛnni ná jwoore ná mekegere ná ȳampeente ná ɲyàhan̄gurugun̄i ta yii shwɔh̄l'e me. 21 Mii na fyáge, mii aha shà yii yyére, Kile kà ɲkwò mii sílege yii á sahan̄ki me. Mii na fyáge, s̄ùpyire t'à kapegigii pyi, maa mpyi ti ɲye a láha ti katupwɔh̄yi ná ti jacwɔore ná ti sílege baa karigii na me, mii àha ɲkwò me s̄u tire kurugo me.

† 12:18 Poli mpyi a jwo uru c̄ɲmpworon̄ɲi kyaa na mà kwò (8.22).

13

Yereyi nizannyi

¹ Mii tontanrawoge ku sí n-pyi ñke yii yyére. Wuu sí n-sà kapegigii pyifeebii sâra si ntàanna ná pi kapyiñkil'e, bà y'à jwo Kile Jwumpe Semεñi i na: «Shiin shuunni taanre ká kani ndemu nya tapyige e ke, lire kani sí n-cwɔɔnrɔ si ntàanna ná pire niñjwuyi i*.» ² Mii tozhɔnwoge yii yyére, mpii pi mpyi a kapegigii pyi ke, mii mpyi a pire puni yeε, mà bâra sùpyire sannte na. Numε, mà mii laage yaha k'à tɔɔn yii na, mii sí yi jwo yii á sahañki, mii aha sà mpiimu ta pi i kapegigii pyi sahañki ke, mii sì ku táan pifee na mε. ³ Ná yii s'à jwo na yii la nyε si ñcè na Kirisita u à u jwumpe le mii ñwɔge e, yii sí li cè. Kirisita fànhe nyε a cyéreε yii karigil'e mε, u maha u sífente cyêre yii na. ⁴ Sèe wi, tène i pi mpyi na u kwòre cige na ke, u mpyi a uye pyi fànha baa yaaga, ñka u à ñè a fworò kwùñi i Kile sífente cye kurugo. Wuu fàn'h'à cyéreε, bà Kirisita woge mpyi a cyéreε mε. Ñka wuu aha núr'a shà yii yyére, yii sí li nya wuu karigii pyiñkanni i, na Kile maha fànhe kaan wuu á, bà u à ku kan Kirisita á mε.

⁵ Yii yiye kàanmucya sèe sèl'e kampyi sèenji na yii na ñaare Kile kuni i. Yii nyε a li cè yiye e na Yesu Kirisita na nyε yii e mà? U aha nta u nyε yii e mε, lir'à li cyêe na yii à kùuñ'a cwo Kile kuni i. ⁶ Ñka mii na sônñi yii sí li cè yiye e na wuu nyε a kùuñ'a cwo Kile kuni i mε. ⁷ Wuu na Kile ñáare, yii àha ñkwò kapii pyi mε. Li kapyiini ñùñke bà ku nyε si li cyêe yii na na wuu na jìn'a kyaa pyi mε, ñka li kapyiini ñùñke ku nyε si yii nya kacenne tapyige e.

* **13:1** Duterenoμu 19.15

Yii a kacɛnɲii pyi, ali lire mée ká nta li sí li cyêe na wuu à wurugo, lire ɲye tapege mɛ. ⁸ Wuu sì n-jà Kile sèenɲi fyiinne mɛ, nde kanni wuu sí n-jà n-pyi ke, lire li ɲye mà u pyi u a sì yyaha na. ⁹ Wuu fânhe mée ká nta k'à cyére, ka yii woge si mpêe, lire na ɲye wuu á funntanga. Wuu Kileɲarege ku ɲye, yii ndìre le Kile kuni i.

¹⁰ Mà mii laage yaha k'à tɔɔn yii na, mii na ɲge lɛtɛɛɲi sémɛni si ɲkan yii á, bà li si mpyi, mii aha nɔ yii yyére, mii àha zà yafyin cwɔɔnrɔ ná fahan'i si ntàanna ná Kafoonɲi fânhe niɲkange e mii á mɛ. U à kuru fânhe kan mii á, si yii tège yii a sì yyaha na Kile kuni i. Ku ɲye a kan si yii ɲùɲɔ kyán Kile kuni na mɛ.

Jwumpe nizanmpe

¹¹ Nyɛ numɛ, mii cɛnmpyiibii, yii pyi funntange e. Nde li sí yii pyi yii ndìre le Kile kuni i ke, yii a lire pyi. Yii a màban leni yiye e. Yii yii sònɲɔre pyi niɲkin, yii i yyeɲiɲke yaha ku pyi yii ná yiye shwɔhɔl'e. Lire ká mpyi, Kilenɲi u maha tàange ná yyeɲiɲke kaan ke, uru sí n-pyi ná yii e. ¹² Yii a cɛnmpworogo fwùɲi kaan yiy'á ná funɲɛnɲi i. Kile wuubii pi ɲye naha ke, pire pun'à yii shéere.

¹³ Wuu Kafoonɲi Yesu Kirisita u ɲwɔ yii na, tàange ku ɲye Kile e ke, kuru ku pyi yii ná yiye shwɔhɔl'e, yii i mpyi Kile Munaani wwoɲɛge e.

KILE JWUMPE SEMENI JWUMPE NINTANMPE
New Testament in Senoufo, Supyire Farakala; spp

copyright © 2008 Wycliffe Bible Translators, Inc.

Language: Supyire Sénoufo (Sénoufo, Supyire)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Senoufo, Supyire

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

9c94658e-b59d-5cd7-bd2e-4e0770667d41